

'LPN ditubuh untuk tolong semua lapisan rakyat'

U.M. - 4 JUL 1978

PARIT BUNTAR 3 Julai — Lembaga Padi dan Beras Negara (LPN) ditubuhkan adalah untuk menolong semua lapisan rakyat di negara ini, khasnya petani-petani, supaya mendapat harga yang memuaskan atas setiap hasil yang mereka perolehi.

Timbalan Perdana Menteri, Datuk Sri Dr. Mahathir Mohamad ketika berucap merasmikan kompleks mengering dan mengilang padi LPN yang berharga \$6.5 juta di Sim-pang Lima di sini hari ini menegaskan:

"Di samping untuk menjaga kepentingan petani, adalah juga menjadi tugas LPN untuk menjaga agar tidak membebankan pihak penggunaan dan merugikan swasta," katanya.

Turut hadir di upacara itu ialah Timbalan Menteri Perusaha-an Awam, Datuk Mustafa Jabar, Timbalan Menteri Perumahan dan Kemajuan Perkampungan, Datuk Haji Ramli Omar, Timbalan Menteri Penerangan Dato' Sri Haji Kamaruddin Mat Isa, Menteri Besar Perak, Wan Mohamad bin Wan Teh, Pengerusi LPN, Datuk Mohamad Sopiee Sheikh Ibrahim dan lain-lain pegawai kerajaan.

Beliau menegaskan, walaupun negara ini mengamalkan sistem perdagangan bebas, te-

tapi kerajaan tidak rela melihat titik peluh petani dan rakyat miskin digunakan oleh golongan lain bagi mendapatkan kekayaan.

Datuk Sri Dr. Mahathir menambah, adalah menjadi tanggungjawab kerajaan untuk menjaga nasib rakyat di negara ini, termasuk petani dan rakyat miskin.

"Dalam usaha LPN untuk memberi harga yang lebih memuaskan kepada petani-petani, pihak LPN juga memastikan supaya usaha itu tidak membebankan pengguna merugikan swasta dan lain-lain pihak," katanya.

Menjawab kecaman yang dibuat oleh setengah pihak yang menyatakan kerajaan terlalu banyak meminjam dari negara luar, Datuk Sri Dr. Mahathir menjelaskan, pinjaman tersebut adalah untuk menjayakan pembangunan semata-mata demi faedah rakyat seluruhnya.

Mengenai pertanyaan atas kesanggupan kerajaan untuk membayar kembali pinjaman itu Timbalan Menteri itu berkata, kalau negara luar sanggup dan percaya memberi hutang, ini tentulah satu tanda di atas kesanggupan kita membayar kembali.

Datuk Sri Dr. Mahathir kemudian mencabar pihak yang sengaja tidak mahu mengakui nikmat

yang mereka perolehi sejak negara ini mencapai kemerdekaan.

Beliau menambah, setiap rakyat negara ini sudah tidak dapat menafikan lagi nikmat dan berbagai kemudahan yang mereka perolehi hasil dari usaha kerajaan.

"Petani-petani pula telah mendapat kenaikan harga padi kira-kira 4 kali ganda daripada masa-masa lalu," katanya.

Datuk Sri Dr. Mahathir menyeru rakyat dari segala golongan di negara ini supaya menginsafi keadaan nasib yang mereka perolehi sekarang dan perubahan-perubahan yang sedang menuju ke arah yang lebih baik sekarang.

Kata Timbalan Perdana Menteri, Malaysia adalah sebuah negara mewah jika dibandingkan dengan setengah negara-negara luar, juga keadaan hidup rakyatnya yang telah banyak berubah dari dahulu dan sekarang.

Sementara itu, di Sungai Siput, ketika berucap kepada 1,000 orang dalam majlis ceramah di Dewan Bandaran, Timbalan Perdana Menteri, Datuk Sri Dr. Mahathir berkata, sesiapa saja yang berbuat sesuka hati tanpa memikirkan perasaan orang lain tidak layak tinggal dalam masyarakat berbilang kaum seperti Malaysia.

"Mereka bolehlah tinggal seorangan di tempat terpencil, dan di sana jika hendak bertelanjang bogel pun mereka boleh," kata Datuk Sri Dr. Mahathir yang juga Pengarah Pilihan-raya Perak.

Beliau kesal banyak parti politik pembangkang memainkan sentimen perkauman dengan tidak memikirkan kepentingan rakyat dan negara di masa hadapan.